

Bosna i Hercegovina  
Federacija Bosne i Hercegovine  
Zeničko-dobojski kanton  
OPĆINA VAREŠ  
OPĆINSKI NAČELNIK



## BAJRAMSKA ČESTITKA NAČELNIKA AVDIJE KOVAČEVIĆA

U jedinoj nam domovini Bosni i Hercegovini dočekujemo još jedan Kurban-bajram. Dočekujemo blagdan u kojem uz prinošenje žrtve – klanje kurbanda u ime Boga Milostivog, pokazujemo, svjedočimo svoju spremnost da žrtvuemo jedan dio našeg imetka koji nam je Bog podario, a s ciljem približavanja Njemu i postizanja Njegova zadovoljstva. Kroz ovu Univerzalnu Istinu, mi zapravo iskazujemo i našu solidarnost u ovozemaljskom životu, našu opredjeljenost da radost bajrama uđe u svaku našu kuću, u svaku avliju i da oplemeni naše duše i učini nam jasnim naše ovozemaljske puteve. Bajram je mnogo više nego što ljudski intelekt može spoznati i riječima stavljenim na hartiju opisati. Zapravo, svako od nas ima svoj doživljaj bajrama i to je njegova uzvišenost i ljepota. U univerzalnom, kosmičkom smislu, u kolektivnom shvatanju bajrama muslimana širom svijeta, a posebno nas bosansko-hercegovačkih - bajram je blagdan zajedništva, jedinstva, razumijevanja, tolerancije i uvažavanja, a to su temelji postavljeni i određeni našom Knjigom vodiljom po kojoj moramo raditi i živjeti.

Svaki bajram ima nešto od svoje posebnosti bez obzira da li se radi o ramazanskom ili o kurban-bajramu, a te posebnosti, prepoznatljivosti, specifičnosti kreiramo mi ljudi u svom bitisanju na ovom svijetu. Kreirajući ambijent u kojem živimo, mi zapravo možda svjesno ili ne, određujemo i naše blagdane. Tako će ovaj Kurban-bajram u pravom smislu riječi biti i mora da bude blagdan JEDINSTVA – ZAJEDNIŠTVA. Pravilno razumijevajući suštinu kurban-bajrama i prinošenja žrtve – klanje kurbanda, mi pokazujemo i svjedočimo našu privrženost vjeri i vjerskim načelima. U svetosti naših vjerskih Istina i univerzalnih Božanskih poruka koje isijavaju iz čina klanja kurbanda i podjele kurbanskog mesa proizilazi samo jedna poruka koja nam mora biti pouka, i nama i generacijama koje dolaze iza nas: „Okupljeni u zajedništvu, jedinstveni u stavu, jasnog shvatanja, poimanja i praktikovanja vjerskih obreda, svjesni prostora u kojem živimo i važnosti države u našem islamskom učenju, mi ne smijemo, mi nemamo pravo, jer nas to naša vjera uči odstupati od zajedništva. Kad iznevjerimo ovo islamsko načelo, iznevjerili smo i sebe i našu domovinu, a ako nam se to desi pitanje je kakvi će biti naši bajrami.“

Uz želju da bajramske dane provedete u zdravlju i dobrom raspoloženju u krugu svojih porodica, prijatelja i komšija - BAJRAM ŠERIF MUBAREK OLSUN!



OPĆINSKI NAČELNIK

Kovačević Avdija, dipl. pravnik

adresa: Zvijezda 34, 71330 Vareš  
identifikacijski broj: 4218285300002  
depozitni račun: 3380002210017420

tel.: 00387 32 848 100; fax: 848 150  
web: www.vares.info  
e-mail: vares@bih.net.ba

